

Morning Dogri (NSD) National News Bulletin 04-06-2024

आकाशवाणी

- लोकसभा चुनाव दे वोटें दी गिनतरी सख्त सुरक्षा बंदोबस्तें हेठ अज्ज बडलै 8 बजे थमां मुख्य भरै च शुरू होई गेदी ऐ।
- ओडिशा ते आंध्रप्रदेश दे विधानसभा चुनाव दे वोटें दी गिनतरी बी अज्ज गै कीती जा'रदी ऐ।
- असम च हाड़ें करी बने दे हालात होर गंभीर होई गे न। राज्य दे 10 जिलें च 6 लख शा मते लोक हाड़ें दी मारै हेठ आए न।
- जर्काता च इंडोनेशिया ओपन बैडमिंटन प्रतियोगिता च भारती खडारी अज्ज अपने अभियान दी शुरूआत करगंन।
- आईसीसी टी-20 क्रिकेट विश्व कप च दक्खन अफ्रीका नै न्यूयार्क दे नासाउ काउंटी अंतर्राष्ट्रीय क्रिकेट स्टेडियम च श्रीलंका गी 6एं विकटें कन्नै हराई दित्ता ऐ।

<><><><><><>

Election Commissioner Conuting

लोकसभा चुनाव 2024 दे वोटें दी गिनतरी बडलै 8 बजे शुरू होइ चुकी दी ऐ। एहदे कन्नो-कन्नी आंध्रप्रदेश ते ओडिशा विधानसभा चुनाव ते किश राज्यें दे विधानसभा उपचुनां दी गिनतरी बी अज्ज गै होआ करदी ऐ। वोटें दी गिनतरी कराने दिएं तैआरिएं बारे कल इक संवाददाता सम्मेलन च जानकारी दिंदे होई मुख निर्वाचन आयुक्त राजीव कुमार होरें दस्सेआ जे मुख्य भरै च वोट दी गिनतरी लेई कोई साढे 10 लख केन्द्र बनाए गेदे न ते इस पूरी प्रक्रिया गी पूरी चाल्ली रमानदार, सुरक्षत ते बवस्था आले ढंगै नै तोड़ चाढ़ने लेई लोड़चदे सब्बै बंदोबस्त करी लैते गेदे न ते पूरी प्रक्रिया दी बड़ी नेडे दा निगरानी दे प्रबंध कीते गेदे न। गिनतरी आले हर केन्द्र च 14-14 टेबलें पर वोटें दी गिनतरी दे प्रबंधन कीते गेदे न ते इस पूरी प्रक्रिया पर तक्क रखने लेई विशेष निगराने ते माइक्रो निबरानें दी तैनाती कीती गेदी ऐ। लोकसभ दे 543 मिंबरें दे चुनाव लेई आम चुनाव 19 अप्रैल गी शुरू होइयै 7में गेडे च पैहली जून गी खत्म होए हे।

गिनतरी आले केन्द्रें ते इंदे आले दुआले दे इलाकें च त्रऊं घेरे आली सुरक्षा प्रबंध कीते गेदे न। शुरुआती रुझान औना शुरु होई गेदे न ते तौले गै केहड़ी केहड़ी सीट पर केहड़ी पार्टी दा जां केहड़ा कोई अजाद मेदवार जित्ता'रदा ऐ, एहदा पता लग्गना बी तौले शुरु होई जाग। उआं गुजरात दी सूरत लोकसभा सीट बीजेपी नै पैहले गै जित्ती लैती दी ऐ जित्थें बीजेपी मेदवार मुकेश दलाल हुंदे खलाफ कोई बी मेदवार चुनां मैदान च नेई बचे दा हा। कांग्रेस दे मेदवार निलेश कुंभानी हुंदा नामांकन रिटर्निंग अफसर नै जांच दे बाद रद्द करी दित्ता हा ते अजाद मेदवारें अपने नामांकन वापस लेई लैते हे। लोकसभा चुनां 2024 च 64 करोड़ कोला मते मतदाताएं वोट पाने दे अपने अधिकार दा इस्तेमाल करियै विश्व रिकार्ड बनाया ऐ जिंदे चा 31 करोड़ कोला मतियां महिला मतदाता हियां।

<><><><><><>

CEO

मुख्य चुनां आयुक्त राजीव कुमार होरें आखेआ ऐ जे भारत दे लोकें 64 करोड़ 20 लक्ख कोला मती गिनतरी च वोट पाइयै जेहड़ा विश्व रिकार्ड बनाया ऐ, एह गिनतरी सब्बने जी-7 मुख्खें जिंदे च अमरीका, यू.के., फ्रांस, जर्मनी, इटली, जपान ते कनाडा शामिल न, दे कोला मतदाताएं दी गिनतरी कोला बी मती ऐ। जम्मू कश्मीर च विधानसभा चुनां करोआने बारे पुच्छे गेदे इक सुआलै दे परते च उनें आखेआ जे चुनां आयोग तौले गै जम्मू कश्मीर च बी चुनां प्रक्रिया शुरु करी देग।

<><><><><><>

Trends

ताजा रुझानें मूजब राजस्थान च 25 लोकसभा सीटें लेई वोटें दी गिनतरी जारी ऐ। इनें 25एं चा 14एं सीटें दे रुझान असेंगी थ्होए न, जिंदे चा 10एं पर बीजेपी ते 4 पर कांग्रेस अगगे चलै करदी ऐ।

<><><><><><>

RNU-Jammu

आकाशवाणी जम्मू दे प्रदेशिक समाचार एकांश आस्सेआ अज्ज लोकसभा चुनाएं दे वोटें दी गिनतरी गी दिक्खदे होई अपने नियमित न्यूज़ बेलेटिनं च किश फेरबदल दे कन्नो—कन्नी किश समें प्रोग्रामें दा प्रसारण बी कीता जा करदा ऐ तां जे अज्ज दिन भ अस अपने श्रोताएं गी चुनावी नतीजें ते रूझानें दी ताजा ते सटीक जानकारी कन्नो—कन्नी गै उपलब्ध करोआंदे रौहगे। हुनै शा किश चिरें परैंत 9.20 पर प्रसारत होने आले साढ़े समाचार बुलेटिन च अस जम्मू ते कठुआ निर्वाचन हल्कें च मतगणना केन्द्रें पर मजूद साढ़े संवाददाताएं कन्नै फोन लाईन राएं लाईव जुड़ियै तुसंगी ताजा रूझानें दी जानकारी देगे। एह्दे परैंत 10.15 पर प्रसारत हाने आला साढ़ा गोजरी खबरें दा बुलेटिन 10 बजे कोला लेइयै 10.10 तगर प्रसारत कीता जाग। फही दिने 11 बजे अस इक लाईव परिचर्चा दा प्रसारण करगे जेह्दे च वरिष्ठ पत्रकार निशिकांत खजूरिया ते पोलिटीकल साईस दे वरिष्ठ प्रोफेसर डॉ. भारत भूषण आनंद साढ़े स्टूडियो च मजूद रौहगन। एह्दे परैंत 12.25 कोला लेइयै 12.35 तोड़ी डोगरी खबरें दा बुलेटिन होग जेह्दे च फही इक बारी अस लाईव फोन लाईन दे राएं अपने संवाददाताएं कन्नै जुड़गे। फही दपैहरी ढाई बजे इक विशेष लाईव फोन इन कार्यक्रम दा प्रसारण कीता जाग। एह्दे परैंत 2 बज्जियै 55 मिंटें पर ते फही 4 बजे डोगरी च 5—5 मिंटें दे विशेष समाचार बुलेटिन प्रसारत कीते जांगन। एह्दे परैंत संजा साढ़े 4 बजे फही इक लाईव फोन इन कार्यक्रम दा प्रसारण कीता जाग जेह्दे च अस अपने संवाददाताएं कोला ताजा नतीजे ते रूझान हासल करियै तुंदे तगर पजागे ते फही संजा 7 बजे कन्नै इक खास चुनावी परिचर्चा दा प्रसारण होग जेह्दे च वरिष्ठ पत्रकार मनु श्रीवत्स ते प्रो. बच्चा बाबू साढ़े स्टूडियो च मजूद रौहगन। साढ़ा संजा सवा 6 बजे आला डोगरी बुलेटिन अज्ज 6.20 कोला साढ़े 6 बजे तोड़ी प्रसारत होग।

<><><><><><><><>

Assam Floods

असम च हाड़ें करी बने दे हालात होर गंभीर होई गेदे न। राज्य दे 10 जिलें च 6 लक्ख शा मते लोक हाड़ें दे लपेटे च न। राज्य सरकारै हाड़ें दी मारे हेठ आए दे जिलें च 191 राहत शिविर ते राहत समग्री दी बंड आले 108 केन्द्र खोले न। राहत ते बचाह लेई एनडीआरएफ ते एसडीआरएफ दियां टीमां बी तैनात कीतियां गेदियां न। पिदले 24एं घैंटें दरान कद्दार जिले च 4 लोकें दी मौत होइ ऐ। एह्दे परैंत राज्य च हाड़ें करी मरने आलें दी गिनतरी बधियै 18 तगर पुज्जी गई ऐ।

समूलचे असम च 577 ग्रां हाडेंद ी मारै हेठ आए दे न ते 6 ज्हार हैक्टर थमां मती राई-बाई आली जिमीं पानी हेठ डुबबी गेदी ऐ। सरकारी सूत्रें मूजब हाडें करी सब्बने शा मते प्रभावत होए दे कददार जिले च 4 लोक अजें बी लापता न। असम राज्य आपदा प्रबंधन प्राधिकरण-एएसडीएमए दे मताबक केई जिलें ढांचे तबाह होई गेदे न। न्यू हाफलोंग ते चंद्रनाथपुर सेक्शन बश्कार रेल दिएं पटरिं गी होए दे नुक्सान गी दिखदे होई पूर्वोत्तर सीगांत रेलवे नै इस रूट पर केई ट्रेनें गी 5 जून तगर रद्द करी दित्ता ऐ।

<><><><><><><>

Indonesia Badminton

जर्काता च इंडोनेशिया ओपन बैडमिंटन प्रतियोगिता च भारतीय खडारी अज्ज अपने अभियान दी शुरूआत करगंन। लक्ष्य सेन, एच.एस.प्रणय, किदाम्बी श्रीकांत, प्रियाशु, राजावत ते किरण जार्ज मर्दे दे इक्कले इक्कले यानि सिंगल्स मैच खेडगंन। एन सिककी रेड्डी ते बी.सुमित रेड्डी मिक्स्ड डबल्स च ते टेरेसा जॉली ते गायत्री गोपीचंद महिला डबल्स च खेडगंन। तनिशा क्रैस्टो ते अश्विनी पोनप्पा, श्वेतपर्णा पांडा ते ऋतु पर्णा पांडा कल महिलाएं दे डबल्स मकाबले च उतरगंन। कल गै पी.वी.सिंधु ते आकर्षी कश्यप महिला सिंगल्स ते चिराग शेट्टी ते सात्विक साईराज रनकी रेड्डी मर्दे दे डबल्स मकाबले खेडगंन।

<><><><><><><>

T-20 World Cup

आईसीसी टी-20 क्रिकेट विश्व कप च दक्खनी अफ्रीका नै न्यूयार्क दे नासाऊ काउंटी अंतर्राष्ट्रीय क्रिकेट स्टेडियम च श्रीलंका गी 6एं विकटें कन्नै हराई दित्ता। एहदे शा पैहले बल्लेबाजी करदे होई श्रीलंका दी पूरी टीम 19 ओवरें ते 1 गेंद च 77 रंजें पर गै ढेर होई गेई। श्रीलंका दी तरफा कुसल मॅडिस ते 30एं गेदें च सब्बने शा मते 19 रंज बनाए। एह टी-20 क्रिकेट च श्रीलंका दा अजें तगर दा सब्बने शा घट्ट स्कोर ऐ। दक्खनी अफ्रीका नै 78 रंजें दे लक्ष्य गी छडे 16 ओवरें ते दऊं गेंदे च 4 विकटें पर 80 रंज बनाइयै हासल करी लैता। दक्खनी अफ्रीका लेई एनरिक मार्टजे नै 4 ओवरें च छडे 7 रंज देइयै 4 विकटां हासल कीतियां। उत्थें गै केशव महाराज ते कैगिसो रबाडा नै 2-2 विकेट लैते। नार्टलें गी प्लेयर ऑफ द मैच चुनेआ गेआ ऐ।

<><><><><><><>

Delhi Water

सुप्रीम कोर्ट नै केन्द्र सरकार गी निर्देश दित्ता जे ओ जबरदस्त गर्मी दे चलदे राष्ट्रीय राजधानी च बने दे पानी दे संकट गी दूर करने लेई उप्पर यमना रिवर बोर्ड दी दिल्ली, हरियाणा ते हिमाचल प्रदेश राज्यें कन्नै इक इमरजंसी बैठक करै। जस्टिस पी.के.मिश्रा ते के. वी.तिस्वनाथन आली अवकाश पीठै 5 जून गी एह बैठक सद्दने दा हुक्म जारी कीता ऐ। पीठै मामले दी अगली तरीक 6 जून पाई ऐ ते आखेआ जे तरीक च बैठक च होए दी कारवाई, संकट कन्नै निबड़ने दे सुझाह ते फैसले बगैरा सारें दी जानकारी अदालतै च पेश करन। अदालत दिल्ली सरकार आस्सेआ पिछले हफते दायर याचिका पर सुनवाई करे करदी ही जेह्दे उनें हरियाणा सरकार गी हिमाचल प्रदेश आस्सेआ उपलब्ध पानी दा बाद्दू हिस्सा वजीराबाद वराज राएँ छोड़ने दा निर्देश देने लेई आखेआ हा।

<><><><><><>

French Open

भारत दे रोहन बोपन्ना ते उंदे आस्ट्रेलियाई जोड़ीदार मैथ्यू एबडेन फ्रेंस ओपन टेनिस च मर्दे दे डबल्स दे क्वार्टर फाइनल च पुज्जी गे न। दुए नंबरै दी इस भारती-आस्ट्रेलियाई जोड़ी नै सुपर टाई-ब्रोकर च इक होर भारती एल.श्रीराम बालाजी ते मैक्सिको दे गिगुएल एजेल रैयेस-वरेला गी 6-7, 6-3, 7-6 कन्नै हराया। क्वार्टर फाइनल च बोपन्ना ते एबडेन दा मकाबला 10में नंबरै दे बेल्जियम दे सैंडर गिले ते जोशन तिलगेन कन्नै होग।

<><><><><><>